



3. ARMIN HALITOVIĆ, dipl. ecc.

**NEZAVISNI KANDIDAT ZA
NAČELNIKA
OPĆINE BOSANSKA KRUPA**

**IZBORNA STRATEGIJA
za Lokalne izbore 2008. godine**

Bosanska Krupa, august 2008. godine

I Z J A V A

Ja, **Armin Halitović, dipl.ecc., nezavisni kandidat za Načelnika općine Bosanska Krupa** na predstojećim Lokalnim izborima koji će se održati 05. oktobra 2008.godine, poštivajući međusobno uvažavanje i toleranciju, stavljajući u prvi plan patriotizam, moral i stručnost, neopterećen stranačkim interesima, uz Vašu pomoć, građani općine Bosanska Krupa, nesebično i istrajno ću se zalagati da:

**BOSANSKA KRUPA POSTANE OPĆINA
PODUZETNIKA I PODUZETNE JAVNE UPRAVE KOJI
ĆE ZAJEDNIČKI, EFIKASNIM I ODGOVORNIM
KORIŠTENJEM LOKALNIH RESURSA STVARATI
PREDUVJETE ZA ODRŽIV EKONOMSKI RAZVOJ OD
KOG ĆE KORIST IMATI SVI GRAĐANI BOSANSKE
KRUPPE, KOJI ĆE VLASTITIM RADOM MOĆI
OSIGURATI DOSTOJAN ŽIVOT SEBI I SVOJIM
PORODICAMA.**

Višegodišnje loše funkcioniranje lokalne samouprave u općini Bosanska Krupa ima za rezultat izuzetno loš materijalno-egzistencijalni položaj većine građana, jako izraženu stopu nezaposlenosti i mnoštvo nerješениh stambeno-socijalnih problema. Sa žaljenjem se može konstatirati da je Bosanska Krupa već dugi niz godina "slijepo crijevo" u Bosni i Hercegovini kroz koju rijetko i u tranzitu prolaze putnici i roba.

Posljedica takvog stanja je zbog toga što aktuelna vlast u općini Bosanska Krupa prolazeći faze od "deset najtežih godina", preko "demokratije" do "jače BiH" nikada nije postavila viziju ekonomskog razvoja općine i sve svoje potencijale stavile u funkciju realizacije istog, već su se njeni kadrovi uglavnom, zarad sopstvenih interesa razilazili u stajalištima i pogledima, što je dovelo do sve više prisutne netrpeljivosti, neuvažavanja i nepovjerenja građana Bosanske Krupe jednih prema drugim.

Neefikasna javna uprava, narušeni međuljudski odnosi zaposlenika u organima uprave, slaba koordinacija sa višim nivoima vlasti i lokalnom privredom, neadekvatan općinski budžet, nedostatna pomoć viših nivoa vlasti, nedovoljna infrastruktura i prisutna razjedinjenost organizacija i građana oslikavaju nepovoljan ambijent za nova ulaganja koja bi doprinjela novom upošljavanju.

Sa zadovoljstvom, uz osobitu čast mogu konstatirati da se većina političkih subjekata u općini Bosanska Krupa, gradeći izbornu strategiju za Lokalne izbore 2008. godine, dajući podršku meni kao nezavisnom kandidatu, ne kandidirajući za poziciju načelnika općine kandidate iz svojih redova, opredjelila za novi pristup građenju povjerenja između političkih subjekata i građana istovremeno. Socijaldemokratska partija (SDP BiH), Stranka za BiH (S BiH), Stranka demokratske aktivnosti (A-SDA), Ekološka stranka (E-5), BOSS, i Stranka radom za boljitak podržavaju moju kandidaturu za načelnika općine Bosanska Krupa. Svi zajedno smo spremni u mandatnom periodu opravdati povjerenje naših birača, radeći na zajedničkim projektima, inicirajući realizaciju projekata iz nadležnosti viših nivoa vlasti, te participirajući sa građanima općine Bosanska Krupa u realizaciji kapitalnih infrastrukturnih projekata, a sve u cilju bržeg razvoja općine i grada Bosanska Krupa na dobrobit svih građana, bez obzira na lokalnu, nacionalnu, vjersku i stranačku pripadnost.

U svom mandatu planiram u suradnji sa političkim partijama (SDP BiH, S BiH, A-SDA, E-5, NS RZB) koje podržavaju moju kandidaturu za načelnika Općine Bosanska Krupa raditi na zajedničkim projektima, a koji trebaju doprinijeti razvoju općine i grada Bosanska Krupa na dobrobit svih građana, bez obzira na socijalnu, ekonomsku, nacionalnu i stranačku pripadnost.

Opredjeljenja sam da sve nove i napredne ideje u društveno-ekonomskom razvoju, ma od kog dolazile prihvatim kao obavezu u političkom i praktičnom angažmanu. Pri tom je moja nezavisna kandidatura bitna prednost, jer neću biti opterećen stranačkom pripadnošću, već ću u svom radu favorizovati sve napredne i progresivne političke i građanske inicijative koje imaju za cilj perspektivniju budućnost naše lokalne zajednice.

Zahtijevam suvremenu i racionalnu općinsku administraciju, koja će isključivo djelovati u funkciji građana. Posebno naglašavam uvođenje menadžerskog pristupa u rukovođenju javnom upravom, izbor tima saradnika na osnovu kriterija stručnosti, iskustva, morala, poštenja i spremnosti za rad, te spremnost na angažman svih kadrovskih potencijala Bosanske Krupe koji izraze želju za djelovanjem u prvacu stvaranja bolje budućnosti za naše građane.

Općinska administracija, kao osnovna jedinica lokalne samouprave treba bit efikasan i funkcionalan servis naših građana, sa uposlenicima koji će u svom radu pokazivati punu profesionalnost i stručnost.

Posebno želim da naglasim da ću odmah po početku trajanja, neopterećen stranačkim i drugim ličnim interesima mora se formirati tim suradnika, prioritet u njihovom odabiru, poštivajući međusobno uvažavanje i toleranciju, stavljajući u prvi plan stručnost, karakter, poštenje, rezultate u dosadašnjem radu, patriotizam, moral i želju da se općina Bosanska Krupa pokrene sa mrtve tačke i da počnemo stvarati bolju budućnost za njene građane. Sa menadžerskim pristupom u rukovođenju općine i dobrim timom stručnjaka, siguran sam da možemo promijeniti sadašnje stanje i u veoma kratkom vremenu ostvariti dobre rezultate u ekonomskom, infrastrukturnom, kulturnom i društvenom razvoju općine i zapošljavanju građana, promicanju Bosanske Krupe kao privrednog i turističkog mjesta i poželjne ekološki čiste destinacije za strane ulagače i turiste.

Osnovni pravci i prioriteti u kojem ću djelovati su grupisani u nekoliko međusobno povezanih oblasti:

- **Lokalna uprava i samouprava**
- **Lokalni ekonomski razvoj**
- **Obrazovanje, sport, kultura i mladi**
- **Socijalna politika, zdravstvo i civilno društvo**
- **Ekologija i prirodna bogatstva**
- **Nastavak i podrška kapitalnim projektima i investicijama**

1. LOKALNA UPRAVA I SAMOUPRAVA

Za postizanje konkretnih promjena u cilju stvaranja efikasnije lokalne uprave, neophodno je izraditi i sprovesti organizacionu šemu i sistematizaciju koja će jamčiti efikasniju općinsku administraciju, neopterećenu političkim i drugim pritiscima, koja će biti skrojena po suvremenim evropskim načelima i koja će građanima pružati kvalitetne usluge i stvarati uvjete za prijeko potreban razvoj. U tom pravcu odmah po preuzimanju dužnosti načelnika planiram provođenje slijedećih aktivnosti:

- završetak izgradnje zgrade općine Bosanska Krupa
- profilisanje općinskog organa uprave u stvarni servis građanima
- informatizirati rad organa uprave
- uspostaviti šalter salu i ubrzati transparentno i kvalitetno pružanje usluga građanima
- osigurati da se svi zahtjevi građana rješavaju u zakonom propisanim rokovima, te građanima transparentno pružiti sve potrebne informacije za ostvarivanje njihovih prava i pružiti im mogućnost da aktivno sudjeluju u radu uprave
- uspostaviti sistem redovitog, pravovremenog i kvalitetnog informiranja građana, o svim zbivanjima na području općine
- osigurati da građani od lokalne uprave budu informirani o svim mogućnostima podsticanja lokalnog razvoja, socijalne, pomoći, obrazovnih, kulturnih, sportskih i drugih sadržaja
- osigurati stalnu stručnu pomoć građanima u ostvarivanju njihovih prava

- organizirati održavanje izbora u svim mjesnim zajednicama i formirati savjete mjesnih zajednica koji će biti aktivno uključeni u sve aktivnosti lokalne zajednice
- obnoviti i izgraditi prostorije, te stvoriti uvjete za aktivan rad mjesnih zajednica i mjesne zajednice informatički povezati sa lokalnom upravom
- uspostaviti suradnju i komunikaciju sa mjesnim zajednicama i mjesnih zajednica međusobno
- oformiti Lokalnu razvojnu agenciju i druge organizacije neophodne za aktivno uključivanje građana, poduzetnika i javnih institucija u poboljšanje kvalitete života na području općine Bosanska Krupa

2. LOKALNI EKONOMSKI RAZVOJ

Po modelima uspješnih primjera u BiH, te susjednih zemalja i zemalja Europske unije, novom organizacionom šemom i novom sistematizacijom organa uprave, ponovno uspostaviti službu za privredu. Služba za privredu će biti suvremeni servis, koji će sa jedne strane svakodnevnim kontaktom sa građanima, poduzetnicima, poljoprivrednicima, te investitorima, finansijskim institucijama, višim nivoima vlasti i raznim dostupnim fondovima planirati ekonomski razvoj, stvarati pravni i tehnički okvir za unapređenje postojećih privrednih i poljoprivrednih aktivnosti, podsticati i pružati pomoć za uspostavljanje novih radnih mjesta. Služba će imati za obavezu da redovito informira lokalnu zajednicu o svim mogućnostima za podsticaje u zapošljavanju, da svim zainteresiranim stranama pruža informacije i tehničku pomoć, da u suradnji sa drugim službama organa uprave, planira i provodi aktivnosti na ubrzanju svih postupaka vezanih za otvaranje novih radnih mjesta, a posebno, u skladu sa Strategijom razvoja općine Bosanska Krupa, da planira, osigurava finansijska sredstva i prati provođenje projekata lokalnog ekonomskog razvoja.

U tom pravcu odmah po preuzimanju dužnosti načelnika planiram provođenje slijedećih aktivnosti:

- Formirati općinsku službu za privredu koja mora stvarati preduvjete za sve razvojne aktivnosti općine i biti veza između općinskog načelnika i lokalnih privrednika
- uspostaviti Agenciju za lokalni ekonomski razvoj, Turističku organizaciju i tim za izradu i praćenje implementacije razvojnih projekata
- revidirati Strategiju lokalnog ekonomskog razvoja, te planirati i osigurati sredstva za financiranje razvojnih projekata
- uspostaviti suradnju sa lokalnim privrednicima, pružati pomoć u izradi projekata i iznalaženju kvalitetnih sredstava u cilju razvoja privrede, poljoprivrede, turizma i novog zapošljavanja
- podsticati udruživanje, te podržati rad udruženja privrednika u Bosanskoj Krupi, pomoći im u radu i koordinirati sa višim instancama u cilju realizacije njihovih projekata
- planirati, stvoriti preduvjete i formirati otvaranje novih poslovnih i industrijskih zona na području općine Bosanska Krupa
- uspostaviti bližu suradnju i komunikaciju sa susjednim općinama na području USK-a, te sa višim nivoima vlasti, kantonalnim, federalnim i državnim institucijama i fondovima
- uspostaviti suradnju sa općinama iz susjednih nam država, sa njima razmjenjivati iskustva i saznanja, te od njih učiti kako na lokalnoj razini iskoristiti fondove koje nudi Europska unija
- stvoriti ambijent za privlačenje novih ulaganja u cilju zapošljavanja građana i novih infrastrukturnih projekata

- kod nadležnih kantonalnih i federalnih institucija tražiti kvalitetno rješenje za privatizaciju još ne privatiziranih privrednih kapaciteta u Bosanskoj Krupi

3. OBRAZOVANJE, SPORT, KULTURA I MLADI

Kvaliteta života, razvijenost, bogatstvo i budućnost svake lokalne zajednice najbolje se može ocijeniti ako se pogleda kakve škole zajednica ima, koliko i kako je organiziran kulturni i sportski život i koliko sadržaja pruža tokom svake godine svojim građanima. Iako imamo Opću gimnaziju u Bosanskoj Krupi i Srednju mješovitu školu i dalje u ovim teškim vremenima proizvodimo kadrove koji će stajati u redovima za posao. Škole rade u veoma skromnim uvjetima, a da ne govorimo o školskim zgradama u našim selima, gdje djeca pohađaju nastavu u apsolutno neprihvatljivim uvjetima. Ako tome dodamo i činjenicu da su nam domovi kulture neobnovljeni, da na području cijele općine nemamo ni jedno igralište za djecu i da gotovo i nema osiguranih novaca za kulturu i sport, veoma je jednostavno izvući zaključak gdje se trenutno nalazimo i kakva nas budućnost očekuje. Kako bi se postojeće stanje promijenilo, kako bi pokazali da volimo i da se brinemo za našu djecu i kako se brinemo za njihovo zdravlje i budućnost, smatram da je neophodno i veoma brzo izvodljivo, da se već u prvoj godini moga mandata stanje iz temelja promjeni, zašto ću se posebno zalagati kroz provođenje slijedećih aktivnosti:

- uspostaviti stalnu suradnju sa školama, roditeljima i djecom
- izvršiti analizu i uz suradnju sa direktorima škola, roditeljima i poduzetnicima podstaknuti formiranje novih nastavnih programa koji će proizvoditi kadrove potrebne tržištu rada
- u srednjim školama podstaknuti otvaranje programa za prekvalifikaciju radnika u tržišno potrebna zvanja
- izvršiti analizu stanja školskih objekata, te izraditi program obnove
- izgraditi novu zgradu Opće gimnazije u Bosanskoj Krupi
- u svakoj mjesnoj zajednici općine Bosanska Krupa izgraditi igralište za djecu
- od istaknutih kulturnih i sportskih radnika općine Bosanska Krupa formirati tim koji će izraditi program razvoja kulture i sporta, na osnovu kojega ćemo planirati i provoditi aktivnosti tokom cijele godine.
- organizirati ljetni kulturni život i obnoviti i promovirati naše tradicionalne kulturne i sportske sadržaje, poput ljeta na Uni, vratiti stari sjaj Unskim lađarima i Una regati, osnovati ljetna pozorišta, vašare, ljetne igre, pa sve do oživljavanja naših starih gradova, tradicionalnih nošnji, viteških igara i folklornog druženja
- izgraditi zgradu Doma kulture u Bosanskoj Otoci i završiti sanaciju Doma kulture u Bosanskoj Krupi
- Pomoći dovršetak izgradnje Sportsko-rekreativnog centra "Bare" u Otoci
- u suradnji sa građanima, lokalnim poduzetnicima i sportskim klubovima izgraditi sportsku dvoranu
- po modelu javno-privatnog partnerstva stvoriti pravne i tehničke pretpostavke za izgradnju sportsko-turističkog kompleksa bazena u Bosanskoj Krupi
- uspostaviti jedinstveni fond za financiranje kulturnih i sportskih projekata
- stvoriti fond za stipendiranje đaka i studenata
- pokrenuti program za podsticanje samozapošljavanja mladih na području općine Bosanska Krupa
- u svim mjesnim zajednicama općine Bosanska Krupa iznaći i urediti prostor za domove mladih
- uključiti mlade u život zajednice, te kreirati programe kojima ćemo mladima omogućiti da sami kreiraju životne sadržaje, organiziraju društveni, kulturni i noćni život

- u centru grada izgraditi prostor za organiziranje koncerata, kulturnih događaja i manifestacija od značaja za širu društvenu zajednicu
- uz aktivno učešće građana, pokrenuti obnovu i uređenje sportskih terena, kako u centru grada, tako i u svim mjesnim zajednicama općine Bosanska Krupa
- urediti staru jezgru grada i izvršiti rekonstrukciju drvenih mostova u Bosanskoj Krupi
- napraviti program za obnovu, zaštitu i oživljavanje zidina naših starih gradova i utvrda
- izgraditi šehidsko spomen obilježje borcima iz odbrambeno-oslobodilačkog rata

4. SOCIJALNA POLITIKA, ZDRAVSTVO I CIVILNO DRUŠTVO

Svi smo svjesni činjenice da danas veliki broj građana naše općine živi na rubu siromaštva i u velikoj je mjeri ovisan od pomoći drugih, bilo da se radi o djeci, komšijama i prijateljima ili da se radi o nadležnim vladinim službama, a ako se tome još doda činjenica, da gotovo 80% radno sposobnog stanovništva nije zaposleno, dovoljno govori o ozbiljnosti prisutnih socijalnih problema. Navedenom treba dodati i problem velikog broja starijih, bolesnih i invalida, te neriješene probleme u Domu zdravlja Bosanska Krupa, koji za posljedicu imaju odliv stručnih i mladih kadrova, veoma skromne mogućnosti u pružanju zdravstvenih usluga. Jednim, veoma malim djelom identificiranih problema se bavi i lokalno civilno društvo, čiji rad je u samim počecima, što je uz sve nedaće sa kojima smo suočeni, potrebno podstaknuti i pomoći, kako bi se udružile sve raspoložive snage i barem ublažilo siromaštvo.

Spomenutu oblast socijalne politike, zdravstva i civilnoga društva, veoma je teško i predstaviti, a o konkretnom i dugoročnom rješavanju svih problema, nemoguće je i pristupiti, da se ne napravi kvalitetno prikupljanje i analiza informacija i podataka i izrada dugoročnog programa mjera, te stoga ću se tokom moga mandata načelnika općine Bosanska Krupa, u suradnji sa svim nadležnim službama, javnim institucijama i predstavnicima civilnoga društva formirati tim koji će se isključivo baviti slijedećim aktivnostima:

- izvršiti socijalnu analizu stanja i u suradnji za Centrom za socijalni rad napraviti program mjera za pomoć najugroženijim kategorijama stanovništva
- izgraditi kapacitete Centra za socijalni rad
- izraditi program za pružanje posebne pomoći kategorijama penzionera, ratnih vojnih invalida, porodicama šehida i demobilisanih borca
- raditi na ponovnom uspostavljanju jedinstvene boračke organizacije na području općine, jer jedino udružene, sa jasnom vizijom i programom rada, mogu se izboriti za bolji položaj u društvu i konkretnije i trajno rješavanje do sada neriješenih pitanja boračkih kategorija
- uspostaviti suradnju sa državnim institucijama, zavodima, nevladinim organizacijama i udruženjima građana, te formirati tijelo koje će na transparentan način, kroz lokalni fond, te kantonalne i državne fondove financirati socijalne i ekonomske projekte i projekte civilnoga društva
- podstaknuti formiranje i osigurati sredstva za rad Javne kuhinje, koja će biti namijenjena najugroženijoj kategoriji stanovništva
- u jednoj od starih zgrada organa uprave osigurati prostor za rad svih nevladinih organizacija i udruženja građana
- u sklopu lokalne razvojne agencije, izraditi projekte i pomoći u financiranju istih, kako bi se trajno, kroz zapošljavanje i samozapošljavanje zbrinjavali demobilizirani borci, invalidi, žene ili osobe, koje su bez posla, a nisu stekle pravo na penziju.

- osigurati sve raspoložive informacije i socijalnim kategorijama pružiti mogućnost, da iz svih postojećih državnih institucija i fondova potražuju sredstva i pomoć
- u suradnji sa menadžmentom i zaposlenima u Domu zdravlja Bosanska Krupa, iznalaziti načine za rješavanje finansijskih problema, te nabavku nove medicinske opreme i sredstava za rad
- u skladu sa postojećom zakonskom regulativom, te strategijama na kantonalnoj i višim razinama, u Bosanskoj Krupi izgraditi Socijalnu i kadrovsku stambenu zgradu, koja bi po modelima zemalja u okruženju služila za stambeno zbrinjavanje socijalnih kategorija i mladih kadrova, liječnika i drugih profesija bez kojih je nemoguće zamisliti život i razvoj nijedne zajednice

5. EKOLOGIJA I PRIRODNA BOGATSTVA

Iako do sada veoma zapostavljena tema očuvanja životne sredine, naših rijeka, potoka, šuma i polja, predstavlja za mene veoma važan zadatak, čemu je hitno potrebno pružiti odgovarajuću pažnju, jer predstavlja naše najveće bogatstvo, te naslijeđe koje, ukoliko ga sačuvamo, možemo da ostavimo našoj djeci. Ne treba zaboraviti činjenicu, da za razliku od onih, koji imaju naftu, a u isto vrijeme nemaju vodu, šumu i zdravu okolinu, mi upravo imamo velike zalihe vode, šume i netaknute pašnjake i polja. Do sada se o tako velikim resursima samo sporadično govorilo, a da se uistinu ništa konkretno i nije radilo. Da bi se napravio konkretan i prijeko potreban napredak u zaštiti i ekološko-ekonomski opravdanoj eksploataciji prirodnih bogatstava, tokom mandata načelnika općine sprovest ću slijedeće aktivnosti:

- formirati posebnu službu za zaštitu prirode i prirodnih bogatstava
- izraditi i osigurati da sve nadležne institucije usvoje program zaštite vodocrpilišta, rijeka, potoka i podzemnih bazena
- podstaknuti izradu strategije za zaštitu prirodne sredine i eksploataciju prirodnih bogatstava
- izraditi projekt kanalizacionog sistema općine Bosanska Krupa, te osigurati sredstva za izgradnju kanalizacije i kolektora za prečišćavanje otpadnih voda
- u Bosanskoj Krupi organizirati naučni skup na temu zaštite vodnog bogatstva, na kome ću podstaknuti konačno rješavanje pitanja deponije smeća, koja mora biti udaljena od naših vodocrpilišta
- podstaknuti završetak projekta ribogojilišta na rijeci Krušnici, te vratiti u prijašnje stanje narušeno korito rijeke Krušnice
- očistiti korito i obale rijeka Une i Krušnice, te uspostaviti sistem održavanja i nadzora riječnog korita i obala rijeka i potoka
- pokrenuti inicijativu, da se i donji kanjon rijeke Une, od Cazin Srbljana do Bosanske Krupe, proglasi parkom prirode, te na takav način zaustavi daljnja devastacija, divlja gradnja i zagađivanje
- podstaknuti lokalne poduzetnike, osigurati im stručnu i finansijsku pomoć, kako bi se iz faze proizvodnje sirovine, preorijentali u proizvodnju gotovog proizvoda, te na takav način bolje iskoristili naše šume i vodu
- u selima stvarati preduvjete, kako bi se seoska domaćinstva, uz proizvodnju hrane i mlijeka bavili i seoskim turizmom, te na takav način popunili lični budžet, bolje prodali svoje proizvode i zaštitili našu prirodu
- uz općine Bihać i Velika Kladuša, priključiti se projektu dovlačenja plina na naš kanton i općinu
- sistemski zaštititi, turističkom signalizacijom obilježiti i predstaviti naša prirodna bogatstva i turističke destinacije

6. NASTAVAK I PODRŠKA KAPITALNIM PROJEKTIMA I INVESTICIJAMA

- pristupiti rješavanju izgradnje infrastrukturnih kapaciteta neophodnih prigradskim naseljima i udaljenim mjesnim zajednicama (vodovodna, kanalizacija, saobraćajna, telekomunikaciona infrastruktura)
- rješavanje pitanja vodovoda Krupa-Pištaline-Jezerski-Mahmić Selo
- izgradnja vodovoda za Radić, te sanacija neobnovljenih džepova struje u Podgrmečkim selima
- sanacija lokalne mreže puteva i asfaltiranje novih dionica po principima zajedničkog financiranja lokalne uprave, kantona i lokalnog stanovništva
- Izgradnja regionalnog puta Bosanska Krupa-Radić-Bihać, Bosanska Krupa-Suvaja - Petrovac i Bosanska Krupa-Arapuša
- Izgradnja regionalne deponije, koja će biti udaljena od naših vodocrpilišta
- Izgradnja plinovoda
- Pomoći dovršetak izgradnje Sportsko-rekreativnog centra "Bare" u Otoci

Uz sve ovo želim da naglasim da ću u svome mandatu poseban akcent i pažnju usmjeriti na stvaranje ambijenta za nova ulaganja i novo zapošljavanje, što je osnova za razvoj grada i općine Bosanska Krupa, jer cilj mi je:

„Vratiti lokalnu upravu i život u općini Bosanska Krupa u vlasništvo i srca njenih građana. Mi imamo jedan život i dužnost nam je i obaveza da svojoj djeci stvorimo ljepšu, bolju i bezbrižniju budućnost, što možemo napraviti samo zajedno!!!!

Dajte priliku nama mlađima, da iskoristimo stečeno znanje, snagu i motivaciju, koju ćemo uz iskustva i tradiciju naših predaka iskoristiti da vratimo povjerenje u sebe i stvorimo bolje sutra! Ne zaboravimo našu prošlost, ali gradimo budućnost zasnovanu, ne samo na našim iskustvima, nego na iskustvima boljih i razvijenijih od nas, izborimo se da naša općina dobije ono mjesto, koje zaslužuje u Bosni i Hercegovini!“

**Nezavisni kandidat za
načelnika općine Bosanska Krupa**

Armin Halitović